

आकाशवाणी

खबरां ----

1. भारत नै फ्रांस कोला 26 रफाल मैरीन जंगी जहाज खरीदने लेई अज्ज इक्क समझौते पर दस्तखत कीते न।
2. प्रधानमंत्री नरेंद्र मोदी होरें पहलगाम आतंकी हमले दे बारै च अज्ज रक्षा मंत्री राजनाथ सिंह हुंदे नै बैठक लाई।
3. जम्मू-कश्मीर विधानसभा नै पहलगाम आतंकी हमले दी जबरदस्त निंदा करदे होई इक प्रस्ताऽ पास कीता ऐ।
4. राश्ट्रीय जांच एजेंसा एनआईए दी इक अदालतै 26-11 आहले मुम्बई आतंकी हमले दे साजिशत तहव्वुर राणा दी एनआईए दी हिरासत गी 12 होर दिनें लेई बध्वाई दित्ता ऐ।
5. राश्ट्रपति द्रौपदी मुर्मू होरें अज्ज राश्ट्रपति भवन च आयोजन पैहले पुरस्कार वितरण समारोह च पद्म पुरस्कार भेंट कीते।
6. भारत नै गलत जानकारी फैलाने आहले 16 पाकिस्तानी यू-ट्यूब चैनलें पर पाबंदी लाई दित्ती ऐ।
7. आई.पी.एल च हुनै कोला किश चिर मगरा राजस्थान रायल्स दा मकाबला गुजरात टाइटन्स कनै होग।

<><><><><><>

## Rafal Deal

भारत नै फ्रांस कोला 26 रफाल मरीन लड़ाकू जहाज खरीदने लेई रक्षा सौदे पर दस्तखत कीते न। अज्ज नमीं दिल्ली च रक्षा मंत्रालय ते फ्रांस सरकार दे अफसरें दी मजूदगी च इस सौदे पर दस्तखत कीते गे। इनें 26 राफेल मरीन जहाजें च 22 सिंगल सीटर ते 4 डबल सीटर होंगन जिनेंगी भारतीय नौसेना दिएं जरूरतें मूजब तैयार कीता जाग।

<><><><><><>

## PM-Defence-Min

रक्षा मंत्री राजनाथ सिंह होरें अज्ज प्रधानमंत्री नरेंद्र मोदी हुंदे कन्नै उन्दे घर जाइयै मलाटी कीती। एहू बैठक करीब 40 मिनटें तगर चली। एहू बैठक पहलगाम आतंकवादी हमले ते ओदे मगरा दी स्थिति गी लेइयै होई ऐ। कल चीफ ऑफ डिफेंस स्टॉफ जनरल अनिल चौहान होरें राजनाथ सिंह हुंदे कन्नै मलाटी कीती ते सैन्य कार्रवाई सरबन्धी केई मामलें पर चर्चा कीती। जनरल चौहान होरें रक्षा मंत्री होरें गी सैन्य रणनीति ते आतंकवाद दे खात्मे लेई कीती जा रदी तैयारिएं बारै दस्सेआ।

<><><><><><>

## LA-Restoration

जम्मू-कश्मीर विधानसभा च हाल च पहलगाम च होए दे आतंकी हमले जेदे च 26 बेदोसे लोक मारे गे हे, दी निंदेआ आहला प्रस्ताव पारित कीता गेआ ते जम्मू-कश्मीर दी तरक्की ते अमन-शांति च विघ्न पाने आहले इनें राष्ट्र विरोधी तत्वे खलाफ दृढ़ता कन्नै लड़ने दा संकल्प लैता। आकाशवाणी दे जम्मू संवाददाता दी जानकारी मूजब उपमुख्यमंत्री सुरिंद्र चौधरी होरें जम्मू-कश्मीर सरकार आसेआ इस प्रस्ताव गी सदन च पेश कीता हा जेदे च आतंकवादियें आसेआ सैलानियें पर कीते गेदे कायराना हमले दी सख्ती कन्नै निंदेआ कीती गई। सत्र दौरान सदन नै केंद्र सरकार आसेआ हाल च लैते गेदे कूटनीतिक

फैसलें दा समर्थन कीता ऐ। एहदे अलावा उनें सब्बनें राज्यें ते केंद्र शासित प्रदेशें अगगे अपील कीती ऐ जे कश्मीरी विद्यार्थियों दी सुरक्षा यकीनी बनान। बाद च विधानसभा दी कार्रवाई गी अनमित्थे समें लेई स्थगित करी दित्ता गेआ।

<><><><><><>

## Assembly-Homage

जम्मू-कश्मीर विधानसभा नै पहलगाम च पिछले हफ्ते आतंकवादी हमले च मारे गेदे 26 लोकें गी श्रद्धांजलि भेंट करने लेई 2 मिनटें दा मौन रक्खेआ। आकाशवाणी जम्मू संवाददाता दी रिपोर्ट मूजब जम्मू च अज्ज विशेष सत्र लगा। विधानसभा दे स्पीकर अब्दुल रहीम राथर होरें इस हमले दी सख्त लफ्जें च निंदा कीती। इस हमले च मुख्य भरै थवां आए दे केई सारे लोक मारे गे हे। उनें मारे गेदे लोकें गी श्रद्धांजलि भेंट कीती ते सौगी परौआरें प्रति अपनी हमदर्दी जाहिर कीती।

<><><><><><>

## CM-Assembly

मुख्यमंत्री उमर अब्दुल्ला होरें विधानसभा गी जानकारी दित्ती जे पहलगाम आतंकवादी हमले मगरा कश्मीर च पैहली बारी आतंकवाद खिलाफ अवाज चुक्की। आकाशवाणी जम्मू संवाददाता दी रिपोर्ट मूजब विधानसभा दे विशेष सत्र गी संबोधित करदे होई मुख्यमंत्री होरें आखेआ जे इस हमले दी सख्त लफ्जें च निंदा होआ'रदी ऐ ते लोकें आसेआ दित्ती जा'रदी प्रतिक्रिया आतंकवाद दे खात्मे दी शुरूआत ऐ। उनें सदन गी जम्मू-कश्मीर दा राज्य दा दर्जा बहाल करने दा पूरा भरोसा दोआया।

<><><><><><>

## Dy CM

उपमुख्यमंत्री सुरिंदर चौधरी होरें अज्ज जोर देइयै आखेआ ऐ जे पाकिस्तान गी इस गल्लै पर ध्यान देना लोड़चदा जे उसी जम्मू-कश्मीर कोला पिछले 3 दाहकें थमां नाs कोई फायदा पुज्जा ऐ ते ना गै भविष्य

च पुज्जोग। पत्रकारें कन्नै गल्ल करदे होई उपमुख्यमंत्री होरें गलाया जे जानियै-जानियै लगातार दखलंदाजी करियै पाकिस्तान गी कोई फायदा नेई होआ ते नांस गै होग। हाल च गै पहलगाम च होए दे आतंकी हमले पर दुख जाहिर करदे होई आखेआ जे इस कायराणा हमले च आतंकवादियें साहडे परौहने गी नशाना बनाया। उनें गलाया जे एह बड़ी मंदें भागें आहली गल्ल ऐ जे बेदोसें लोकें अपनी जान मुहाई दित्ती ते जम्मू-कश्मीर दे लोकें पर एहदा बड़ा माड़ा असर पेआ ऐ। उनें भरोसा दोआया ऐ जे भविक्ख च इयै नेहा कोई हादसा पेश नेई आवै ते खित्ते च शांति ते रमानदारी बनी दी रवै। एहदे लेई सख्त कार्रवाई कीती जाग।

<><><><><><>

## Rana-Custody

2008 च होए दे मुम्बई आतंकी हमले दे मुख् साजशकर्ता तहव्वुर राणा दी एनआईए दी हिरासत 12 होर दिनें लेई बधाई दित्ती गई ऐ। अज्ज नमीं दिल्ली च एनआईए दी विशेष अदालतै च उसी पेश कीता गेआ। पैहले ओहू 18 दिनें दी रिमांड पर हा जेड़ी अज्ज पूरी होई गई ऐ। 22-11 आले इनें हमलें च 166 लोक मारे गे हे। डेविड कोलमैन दे करीबी राणा गी 4 अप्रैल गी अमरीका नै भारत गी सौंपी दित्ता हा।

<><><><><><>

## Army Firing LoC

पाकिस्तानी फौज नै जंदी रातीं कुपवाड़ा ते पुंछ जिलें च कब्जा रेखा पर बिजन इश्तेयाल दे लौहके थेआरें कन्नै गोलीबारी कीती। रक्षा मैहकमे दे जन संपर्क अधिकारी होरें इस गल्लै दी तस्दीक कीती ऐ जे भारती बलें तुरत ते तगड़ेयाई कन्नै इस कार्रवाई दा परता दित्ता। ध्यानजोग ऐ जे पाकिस्तान आसेआ जम्मू-कश्मीर च कब्जा रेखा पर बार-बार संघर्ष विराम दी खलाफवर्जी कीती जा'रदी ऐ। रक्षा सूत्तरें

दस्सेआ ऐ जे पाकिस्तानी चौकिएं थमां बिजन भड़कावे दे कीती जा'रदी गोलीबारी दा भारती फौज बनकदा जोआब देआ करदी ऐ।

<><><><><><>

## Indian Diaspora Protest

जम्मू कश्मीर च पहलगाम आतंकी हमले च हिंदू सैलानिएं गी नशाना बनाए जाने खलाफ विरोध प्रदर्शन दुनिया भरै च कीते जा'रदे ना। मैलबर्न दे फेडरेशन स्कॉयर थमां लंदन च पाकिस्तान उच्चायोग ते कोपनहेगन थमां लेइयै काठमांडू च पाकिस्तानी दूतावास तगर प्रदर्शनकारिएं इस आतंकी हमले दी निंदेया करदे होई लोडचदी कारवाई करने दी मंग कीती। पूरी दुनिया च भारतीय मूल दे लोकें इक जुट होइयै आक्रोश ते दुख दा प्रदर्शन कीता ते आतंकवाद खलाफ आवाज पुट्टी। भारतीय मूल दे लोकें फ्रांस दे पेरिस, स्वीजरलैंड दे यूरिच, फिनलैंड दे हेलसिंकी, स्पेन ते होर दुए मुल्लखें च बी व्यापक विरोध रैली कड्डी। उनें किट्टे होइयै मारे गेदे लोकें गी श्रद्धांजलि भेंट कीती ते आतंकवाद खलाफ सख्त सनेहा दित्ता।

<><><><><><>

## President Awards

राष्ट्रपति द्रौपदी मुर्मू होर अज्ज संजा राष्ट्रपति भवन च इस बरे दे पैहले नागरिक सम्मान समारोह च पद्म पुरस्कार प्रदान कीते। देसै दे सर्वोच्च नागरिक सम्मान च शामिल पद्म पुरस्कार त्रै श्रेणिएं-पद्म विभूषण, पद्म भूषण ते पद्म श्री च दित्ते जंदे ना। कला, समाज सेवा, जनहित कम्में, विज्ञान ते इंजीनियरिंग बपार ते उद्योग, चिकित्सा, साहित्य ते शिक्षा, खेडुं ते लोकसेवा समेत बक्ख-बक्ख खेत्तरें लेई एह सम्मान दित्ते जंदे ना। इस बरे गणतंत्र दिवस दी पूर्व संध्या पर सरकार नै 139 पद्म पुरस्कारें

दी घोशणा कीती ही। इन्दे च 7 पदम विभूषण, 19 पद्म भूषण ते 113 पद्म श्री पुरस्कार शामिल ना। मन्ने परमन्ने दे वायलिन वादक ते संगीतकार डॉ. एल.सुब्राह्मण्यम ते गैस्ट्रोएंट्रोलाजिस्ट डी. नागेश्वर रेड्डी गी पद्म विभूषण कन्नै सम्मानत कीता गेआ ते मन्ने परमन्ने दे संपादक ते प्रसार भारती दे साबका अध्यक्ष ए.सूर्य प्रकाश, अभिनेता अनंतनाग, नंदमुरी बाला कृष्ण ते एस.अजित कुमार, भारत नाट्यम नृत्यांगन शोभना चन्द्रकुमार ते भारतीय हॉकी टीम दे साबका कप्तान पी.आर.श्रीतेश पदम भूषण हासल करने आलें च शामिल ना।

<><><><><><>

## Israel

इजराइल नै कल लेबनान दी राजधानी बेरूत दे दक्खनी इलाकें पर ब्हाई हमले कीते। एह्दे शा पैहले उन्ने ईरान दे सर्मिन आले हिजबुल्ला आस्सेआ कथित तौरा पर बरती जा'रदिएं इमारतें गी खाली करने दा हुक्म जारी कीता हा। 4एं म्हीने पैहले लागू इस संघर्ष विराम दे बावजूद एह् हमला होआ ऐ। इजराइल नै आखेआ ऐ जे उन्ने हिजबुल्ला दिएं मिसाइलें दे भंडार गी नशाना बनाया जेह्दा ओह्दे नागरिकें लेई बड्डा खतरा हियां। लेबनान दे राष्ट्रपति होरें हमले दी निंदेया करदे होई नवम्बर च युद्ध विराम दी प्रक्रिया च पैंची करियै बचोलियै दी भूमिका नभाने आले अमरीका ते फ्रांस अगो इजराइल पर हमले बंद करने लेई दबाहू पाने दा आह्वान कीता। तोआई इजराइल सरकार नै आखेआ ऐ जे ओह् हिजबुल्ला दी तरफा कुसै बी हमले जां चुनौती दा पूरी तगढेयाई कन्नै परता देग।

<><><><><><>

## Canada

कनाडा च अज्ज वोट पाए जाने ना। वोट पाने दा कम्म मकामी समें दे मताबक बडुलै 7 बजे शुरू होग जेडा जे भारती समें दे मताबक संझा साडु 7 बजे ऐ। मेद ऐ जे रातीं साडु 10-11 बजे दे कोल काल नतीजे ते रून औना बी शुरू होई जाग। अमरीका दे राष्ट्रपति डोनाल्ड ट्रंप हुंदी अप्रत्याशित टैरिफ नीतिएं ते कनाडा गी 51मां अमरीकी राज्य बनाने दे आह्वान दे चलदे एह चुनां होआ'रदा ऐ। मतदाताएं बश्कार आर्थिक अस्थिरता, जीवन यापन ते आवास दी लागत ते जलवायु नीति दे मुद्दे राष्ट्रीय चर्चा दा केन्द्र बने दे ना। चुनां च लिबरल पार्टी दे प्रधानमंत्री मार्क कार्नी ते विपक्षी कंजर्वेटिव पार्टी दे पियदे पोलीवर प्रमुख मेदवार ना।

<><><><><><>

## Pak Channel Banned

पहलगाम आतंकी हमले दे बाद झूठा प्रोपोगेंडा करने ते भारत खलाफ जैहर उगलने आहले 16 पाकिस्तानी चैनलें गी भारत नै बैन करी दित्ता ऐ। पिछले केई दिनें थमां पाकिस्तान दे नेता, कट्टरपंथी, न्यूज चैनल ते यूट्यूबर पाकिस्तान गी साफ-सुथरा दस्सने ते भारत दा माहौल खराब करने च लग्गे देन। इनें चैनलें च प्रमुख डॉन न्यूज, समा टीवी, इरशाद भट्टी, ARY News, BOL News, रफ्तार, जियो न्यूज, उमर चीमा, राजीनामा ते होर केई दुए चैनल शामिल ना।

<><><><><><>

## Iran Blast

दक्खन ईरान दे बंदर अब्बास शैह कश बंदरगाह च होए दे धमाके च मरने आलें दी गिनतरी 46 होई गेई ऐ। शनिवार गी होए दे इस धमाके ते एह्दे मगरा लग्गी दी अगग च इक ज्हार थमां मते लोक घायल होए हे। घटना दे सेई कारण दा अजें बी पता नेई लग्गा ऐ। एह् धमाका ऐसे समें च होआ ऐ जिसलै ईरान नै अमरीका कन्नै अपने परमाणु कार्यक्रम दे बारे च त्रीए गेड़ दी गल्लबात मसां शुरू कीती ऐ। जानकारी मूजब धमाके दे 40 घंटें बाद बी किश-किश थाहरें अजें बी अग्गी दे भांबड़ ते कुतै-कुतै धुखदी अगग ते धुआं दिक्खने गी लब्बा रदा ऐ। ईरान सरकार दे प्रवक्ता फातिमे मोहजेरानी होरें इक सोशल मीडिया पोस्ट च आखेआ जे ईरान च अज्ज इक दिनै दे शोक दी घोशणा कीती गेई ऐ। ईरान दे राष्ट्रपति मसूद पेजेशकियन होरें कल बंदरगाह दा दौरा कीता ते हालात दा जायजा लैता।



## Waves

विश्व ऑडियो विजुअल ते मनोरंजन शिखर सम्मेलन वेव्स 2025 पैहली थमां 4 मई तोहड़ी मुम्बई च आयोजित होग। शिखर सम्मेलन च भारत मंडप च देसै दी विरासत ते वैश्विक मीडिया ते मनोरंजन देबधदे प्रभाऽ दा प्रदर्शन होग। 'कला से कोड' विशे पर आधारित इस मंडप च भारत दी वसुधैव कुटुम्बकम् यानि दुनिया इक्क परौआर ऐ दी भावना प्रदर्शित होग। एह्दे च एह् दस्सेआ जाग जे कियां देसै दी कलात्मक परम्परा लम्में समें थमां रचनात्मक, सद्भाव ते सांस्कृतिक कूटनीति दा प्रतीक रेइयां न। इत्थे चार खेत्तर आम लोकें गी भारती कहानी सुनाने दी परम्पराएं कन्नै अवगत करोआडन। भारत मंडप मीडिया ते मनोरंजन खेत्तर दे रचनाकारें, सहयोगियें ते परिवर्तन करने आहलें लेई इक गतिशील मंच ऐ। एह् बक्ख-बक्ख सरबंधत धड़ें गी भारत दी असाधारण प्रतिभा, उन्नत तकनीकें ते तेजी कन्नै बधदे बजार दी समर्थ कन्नै जुड़ने दा इक महत्वपूर्ण मौका उपलब्ध करोआग। भारत मंडप सांस्कृतिक



विरासत दे प्रदर्शन दे अलावा बन्न-सबन्नी सांस्कृतिक भागीदारी ते निवेश गी बढ़ावा देने च मजबूत सरकारी सहयोग दा बी प्रतीक होगा।

<><><><><><>

## IPL

आईपीएल क्रिकेट च अज्ज राजस्थान रॉयल्स दा मकाबला गुजरात टाइटंस कन्नै होगा। एह मैच जयपुर दे सवाई मानसिंह स्टेडियम च हुनै कोला किश चिरै मगरा संजा साढ़े 7 बजे शुरू होगा। एहदे शा पैहले कल ऐतवारें दऊं मैच खेडुं गे। पैहले मैच च मुंबई इंडियन्स नै लखनऊ सुपर जायंट्स गी 54 रंज कन्नै हराया। 216 रंज दे लक्ष्य दा पिच्छा करदे होई लखनऊ दी टीम 20एं ओवरें 161 रंज गै बनाई सकी। तोआई इक दुए दिलचस्प मकाबले च कल रातीं रॉयल चैलेंजर्स बेंगलुरु नै दिल्ली कैपिटल्स गी 6एं विकेटें कन्नै हराई दित्ता। 163 रंजें दे लक्ष्य दे परते च बेंगलुरु नै 15 ओवर ते 3 गेंदें च 4 विकेटां मोहाइयै 165 रंज बनाए। बेंगलुरु लेई क्रुनाल पांडया नै सब्बने शा मते 73 रंज बनाए ते नाँट आउट रेहू। उनेंगी प्लेयर ऑफ द मैच घोशत कीता गेआ। विराट कोहली नै 51 रंज दा योगदान दित्ता। दिल्ली कैपिटल्स लेई अक्षर पटेल नै दऊं विकेटां लैतियां। दिल्ली नै पैहले बल्लेबाजी करदे होई 20एं ओवरें च 8एं विकेटें दे नुकसान पर 162 रंज बनाए हे।

<><><><><><>